

Nur Aur Añdhere Kā Safar

Injeel : 1 Yuhannā 1:5-10; 2:1-11

[Īsā^(a.s) ke shaagird janaab Yuhannā ne logoñ se kahā:] Ye paigaam hameñ Allaah rabbul azeem se milā aur ham tum logo tak ise pahuñchā rahe haiñ: Allaah rabbul azeem ek nur hai aur uske añdar bilkul bhī añdherā naheen.⁽⁵⁾ To agar ham ye kaheñ ki ham Allaah taa'alā ke bataae hue raaste par haiñ aur phir bhī añdhere me chal rahe haiñ, to ham jhuṭhe haiñ aur nekī ke raaste par naheen haiñ.⁽⁶⁾ Lekin agar ham Allaah taa'alā ke bataae hue raushan raaste par chaleñge to ham bhī uske dost ban jaeñge aur Īsā^(a.s) kī qurbaanī se hamaare saare gunaah bhī maaf kar die jaeñge.⁽⁷⁾

Agar ham ye kahte haiñ ki hamne koī gunaah naheen kiye haiñ, to ham kḥud ko dhokā de rahe haiñ, aur hamaare añdar sach naheen haiñ.⁽⁸⁾ Lekin agar ham apne gunaahoñ ko qubul kar leñ, to Allaah rabbul azeem hamse kiye hue waade ko purā karegā aur hamko maaf kar degā. Wo kḥud paak haiñ aur hamko bhī hamaare gunaahoñ se paak kar degā.⁽⁹⁾ Agar ham kahte haiñ ki hamne kabhī gunaah hī naheen kiye, to ham Allaah rabbul azeem ko jhuṭhā kah rahe haiñ, aur ham uske kalaam ko gālat saabit kar rahe haiñ.⁽¹⁰⁾

2:1-11

Mere pyaare bacchoñ, maiñ tumko ye kḥat islie likh rahā huñ taaki tum gunaahoñ se bacho. Lekin agar kisī ne gunaah kiyā hai, to hamaarā Maseehā, Allaah taa'alā kī baargaah me, hamaare liye fariyaad karegā.⁽¹⁾ Unhone nā hī sirf hamaarā balki purī duniyā ke logoñ ke gunaahoñ kā kḥud kuffaarā diyā haiñ.⁽²⁾

Agar ham uske hukm par amal kareñge, tabhī ham kah sakte haiñ, ki ham Allaah rabbul azeem ko jaante haiñ.⁽³⁾ Agar ham ye kaheñ ke ham usko jaante haiñ, lekin uske hukm par amal naheen kareñ, to ham jhuṭh bol rahe haiñ. Kyuñki phir is baat me koī bhī sacchaaī naheen hogī.⁽⁴⁾ Jo bhī Allaah taa'alā ke kalaam par amal karegā to Allaah taa'alā use apnī muhabbat se bhar degā.⁽⁵⁾ Hameñ waise hī zindagī guzaarnī chaahie ki jaisī Īsā^(a.s) ne guzaarī thī.⁽⁶⁾

Mere pyaare bacchoñ, maiñ jo hukm likh rahā huñ wo nayā naheen haiñ; ye puraanā hī hukm haiñ, jo tumhaare paas shuru se thā. Pahale kā hukm wo hī haiñ ki jis paigaam ko tumne sun rakhā haiñ.⁽⁷⁾ Lekin maiñ tumko ek nayā hukm bhī likh kar de rahā huñ, jo tumhaare aur Īsā^(a.s) ke saamne ek haqeeqat haiñ, kyuñki añdherā dur ho rahā haiñ aur aslī nur chamakne lagā haiñ.⁽⁸⁾

Jo bhī ye kahtā haiñ ki wo is raushnī me hai, lekin apne bhaaī se nafrat kartā haiñ, to wo añdhere me hī rahegā.⁽⁹⁾ Lekin wo insaan raushnī maiñ haiñ jo apne bhaaī se muhabbat kartā haiñ. Wo nā hī kabhī giregā aur nā hī kabhī bhaṭkegā.⁽¹⁰⁾ Maiñ phir se kahtā huñ, jo apne bhaaī se nafrat karegā wo añdhere me hī rahegā aur añdhere me hī safar karegā. Wo ye kabhī naheen samajh paege ki wo kahaan jā rahā haiñ, kyuñki añdhere ne usko añdhā kar diyā hogā.⁽¹¹⁾